

Atvinnuleysisbætur til þeirra, sem njóta örorkubóta skv. lögum um almanna-tryggingar, greiðast aðeins að því marki, sem þær eru hærri en bætur almanna-trygginga. Með bótum almanna-trygginga í þessu sambandi teljast barnalífeyrir og makabætur, sem bótaþegi atvinnuleysisbóta kann að fá greiddar.

Bótaþegi, sem öðlast hefur bótarétt vegna hálf dagsvinnu, sbr. d-lið 6 gr., skal fá greiddar hálfar bætur, sbr. a—c-lið þessarar greinar. Þó skal slíkur bótaþegi, sem stundað hefur heildagsvinnu síðasta mánuðinn, áður en bótagreiðslur hefjast, fá greiddar fullar bætur.

Eigi má gera fjárnám eða lögtak í bótafé skv. reglugerð þessari né halda því til greiðslu opinberra gjalda.

11. gr.

Bætur greiðast úr sérreikningi þess félags, sem bótaþegi telst til.

12. gr.

Nefndin skal gera skrá um þá menn, sem hún úrskurðar bætur. Skal á skrá þessari tilgreina, hverrar tegundar bætur eru og hve háar. Sé ágreiningur um úthlutun, skal þess einnig getið í skránni og tilgreina í hverju ágreiningur sé fólgin. Skrá þessa skal nefndin senda umboðsmanni Tryggingastofnunar ríkisins ásamt öðru eintaki bótaumsóknar með tilheyrandi fylgiskjölum. Hafi bótaþega áður verið úrskurðaðar atvinnuleysisbætur á sama bótatímabili, skal skránni fylgja úrskurður um framhaldsbætur ásamt framhaldsvottorði vinnumiðlunar.

13. gr.

Úthlutunarnefnd annast sjálf greiðslu bóta, nema hún kjósi að fela Tryggingastofnuninni, eða umboðsmönnum hennar bótagreiðslurnar. Að fenginni úthlutunarskrá, skal Tryggingastofnunin, að lokinni athugun sinni á skránni, sbr. 6.—10. gr. reglugerðar þessarar, láta úthlutunarnefnd í té skrá um bæturnar ásamt nægilegu fé til greiðslu þeirra. Úthlutunarnefnd annast þá greiðslu bóta til einstakra bótaþega, gegn kvittun þeirra á skrána. Að loknum bótagreiðslum skal úthlutunarnefnd afhenda Tryggingastofnuninni skrána.

Reglugerð þessi, sem sett er að fengnum tillögum stjórnar atvinnuleysisstryggingasjóðs, staðfestist hér með samkvæmt lögum nr. 57 27. apríl 1973, um atvinnuleysisstryggingar, til þess að öðlast gildi þegar í stað, og birtist til eftirbreytni öllum, sem hlut eiga að máli.

Heilbrigðis- og tryggingamálaráðuneytið, 1. júlí 1973.

Magnús Kjartansson.

Páll Sigurðsson.

AUGLÝSING

um staðfestingu sjávarútvegsráðuneytisins á grundvallarverði á óverkuðum saltfiski fyrir framleiðslutímabilið 1. júní til 30. september 1973.

Með skírskotun til laga nr. 72 28. maí 1969, um Verðjöfnunarsjóð fiskiðnaðarins og samkvæmt tillögu stjórnar Verðjöfnunarsjóðs, hefur ráðuneytið staðfest eftirfarandi grundvallarverð á óverkuðum saltfiski fyrir framleiðslutímabilið 1. júní til 30. september 1973:

Óverkaður saltfiskur.

Stórfiskur nr. 1	kr. 95.00
Millifiskur nr. 1	— 89.00
Smáfiskur 40/60 nr. 1	— 84.00
Smáfiskur 60/100 nr. 1	— 79.00

Verð á öðrum gæðaflokkum er ákveðið í hlutföllum söluverða.

Verð þessi miðast við f.o.b. Verðbil verður 2.5% og gildir bæði við verðhækkun og verðlækkun. Greiðslur í sjóðinn eða úr honum miðast við 50% verðbreytingu að viðbættu eða frádrögnum verðbili.

Sjávarútvegsráðuneytið, 5. júlí 1973.

F. h. r.

Jón L. Arnalds.

Gylfi Þórðarson.

AUGLÝSING

um breytingu á auglýsingu nr. 167 6. júní 1973 um takmarkað leyfi til dragnótaveiða sumarið 1973.

1. gr.

3. og 4. töluliðir III. kafla falli niður, en í þeirra stað komi nýr töluliður nr. 3 svohljóðandi:

3. Í Skagafirði innan línu úr Skagatá í Straumnes á tímabilinu frá 1. ágúst til 30. nóvember.

2. gr.

5.—15. töluliðir III. kafla breyti um númer þannig að 5. tl. verði 4. tl., 6. tl. verði 5. tl. o. s. frv.

3. gr.

15. töluliður, sem skv. 2. gr. verður 14. tl. orðist svo:

14. Í Þistilfirði innan línu úr Melrakkanesi í Svínalækjartanga, nema á tímabilinu frá 15. ágúst til 30. nóvember, en þá skulu dragnótaveiðar heimilar milli lína, sem dregnar eru frá Hleinatanga í Laxártanga og úr Grenjanesi í Rauðanes. Einnig innan og vestan línu, sem dregin er úr Rauðanesi í ytra Lokahorn við Krossavík.

Auglýsing þessi er sett samkvæmt lögum nr. 40 9. júní 1960 um takmarkað leyfi til dragnótaveiða í fiskveiðilandhelgi Íslands undir visindalegu eftirliti til þess að öðlast þegar gildi og birtist til eftirbreytni öllum, sem hlut eiga að máli.

Sjávarútvegsráðuneytið, 12. júlí 1973.

F. h. r.

Jón L. Arnalds.

Þórður Ásgeirsson.